



Job 38,1.8-21; 42,1-3.5

Iha livru Job nian, to'o pontu ida ne'e, autór haktuir buat ne'ebé akontese ba Job no ninia belun na'in 3 nia interpretasaun ho job nia resposta. Loloos, la iha ema ida ne'ebé bele esplika buat ne'ebé mosu ba Job, buat hotu ne'ebé ema dehan la fó konsolasaun ba Job no, aat liután, sadik pergunta seluk tan.

Iha kap. 38, Maromak rasik mosu tanba parese katak ninia intervensaun presiza liu. Estilu ne'ebé autór uza, hanesan debate iha tribunál: ema ida (iha ne'e Maromak) simu akuzasaun no Nia tenke defende An. Maibé, se ita fó atensaun, Maromak la hatán ba Job no ninia belun sira nia pergunta, Nia hatán tuir ninia lojika eh ironia no, ikus nian, Nia mak fó pergunta ba Job no Job tenke hatán!

Husi kap. 38 to'o 41, Maromak apresenta mistériu mundu nian no Ninia mistériu, hodi halo Job sai nonook. Se ita hanoin katak Maromak sei hatán, ita sai hanesan Job nia belun nain 3, maibé Maromak la sai hanesan ema ida ho ninia hanoin, buat ne'ebé Nia ko'alia, liuhusi poezia no imajen oioin, halo Job komprende, depoizde itinérariu naruk liu, katak nia mak kriatura no la bele ba hasoru ninia Kriadór.



Objetivu testu nian

Ho pasajen ida ne'e, autór hakarak ema komprende katak Maromak nia mistériu boot liu ba ema hotu; maski matenek liu, maski ema bele estuda barak liu, nia la bele tama kle'an iha Maromak nia mistériu no nia la bele komprende signifikadu kona-ba buat hotu ne'ebé mosu iha ninia moris.

Pasajen ida ne'e hakarak mós hatudu ema nia atitude loos hasoru Maromak nia mistériu: hakfodak, haraik an, hahi'i, konfia no saran buat hotu iha Maromak nia liman. Iha parte seluk livru nian, bele haree katak Job no ninia belun sira hetan susar atu moris tuir atitude sira ne'e: ida-idak hakarak hatudu katak nia hatene barak liu fali sira seluk no sira ko'alia hanesan sira mak sasán hotu nia na'i.

Pergunta ne'ebé gia livru tomak: "Maromak bele buat hotu karik, tansá la liberta ema husi terus no moras?" hetan resposta iha kapitulu sira ne'e. Maromak bele buat hotu no kriaun mak sasin kona-ba ninia kbiit, maibé Nia permite terus no moras no buat aat sira ne'e tama iha Ninia planu salvasaun nian.

Iha Job nia resposta finál, bele haree dalan naruk konversaun nian ne'ebé nia halo liuhusi terus, mate no moras: bainhira nia husik ninia justisa, ninia motivaun no ninia glória no hatudu atitude kiak nian iha Maromak nia oin, Maromak fó fali buat hotu ne'ebé ninia. Entaun livru ida ne'e sai konvite ida ba povu Israel atu la kontinua hanoin no husu kona-ba ninia destin, maibé la'o ho konfiansa iha dalan ne'ebé Maromak hatudu, maski dalan ne'ebé seidauk hatene.



Pontu ruma ne'ebé ita aprende husi pajina ida ne'e:

- Leitura ida ne'e nia parte finál lee dala barak iha "Missa Requiem", tanba hakarak fó esperansa katak, maski oras ne'e ita bele hasoru terus no mate, Maromak nia prezensa sei la lakon.
- Maski ita buka terus ka mate nia motivu eh kauza ho ita-nia matenek ita la bele komprende buat hotu: atitude loos nian mak simu mistériu Domin Maromak nian ho konfiansa.
- Iha esperiênsia hotu, aat ka di'ak, ita bele "haree" ho ita-nia matan rasik Maromak nia prezensa, liuhusi ema seluk ninian: Maromak nia domin la bosok, liuhusi dalan oin seluk sira, Maromak tau matan ba ninia kritura nafatin.



Leitura testu nian

Hanesan enkontru uluk kona-ba Biblia, ita bele lee pasajen Exodu nian ho esplikaun badak ruma ne'ebé Biblia ekumenika fó no iha sorin bele hetan pasajen seluk Biblia nian ne'ebé iha ligasaun ho versikulu sira ne'e.

38 ¹Maromak Futar Lian housi anin boot hodi dehan ba Job: ⁸„Wé mai housi rai okos; ema sê mak bele satan netik nia? ⁹Ha'u fo hatais tasi hodi kalohan, Ha'u falun tasi ho abu-abu; ema sê satan netik nia? ¹⁰Ha'u duni halibur wê tasi, ha'u duni taka metin tiha nia no ¹¹ha'u dehan ba tasi:”ó sei to'o deit fatin ida ne'e. Ó nia laloran kbiit, la liu fatin ida ne'e”. ¹²To'ok dala ruma iha ó nia moris ó fo orden ba dader saan, ó hatudu fatin ba rai-hun mutin, ¹³atu nia simu Rai lidun sira hodi liki^a sai ema aat sira? ¹⁴Rai ne'e bele muda hanesan táhu simu marka housi selo, bele simu kor oi-oin hanesan vestidu^b ida. ¹⁵Nune'e, Nia roman lakohi fó naroman ba ema laran aat sira^c, no harahun ema loko-an sira nia kbiit. ¹⁶Kala ó tun ona ba tasi nia wé-matan hodi la'o housi tasi okos liu? ¹⁷To'ok mosu ona ba ó Mate nia odamatan sira no ó haré ona odamatan boot rai nakukun nian? ¹⁸Ó hatene rai ulun rai ikun tomak? Ó hatene buat hirak ne'e hotu karik, koa'lia ba! ¹⁹Dala ida nebé mak ba roman nia horik fatin no ba nakukun nia horik fatin, sira hela lós iha nebé, ²⁰atu ó bele lori sira ba nia ukun, hodi hetan dalan badak ba nia horik fatin? ²¹Tebes, ó hatene nia, basá, ó moris tiha ona iha oras nebé, ó nia tinan boot ona ..” 42 ¹Job hatán ba Na'i hodi dehan: ²„Ha'u hatene katak Ita bele halo hotu-hotu, basá, ba Ita, buat ida la susar. ³Sê mak bele teri netik Ita hanoin ho lia fuan mamuk sira be folin láek? Tebes duni, ha'u ko'alia kona ba kmanek sira be liu fali ha'u nia matenek nebé ha'u la hatene. ⁴„Rona ha'u no ha'u sei ko'alia, ha'u sei husu no Ita hanorin ha'u” ⁵Ha'u hatene de'it Ita tan rona ko'alia kona ba Ita, maibé, oras ne'e ha'u matan haré ona Ita^d.	9,17; 40,6 Bar 3,34-35; Zk 4,7; Esd 3,10 7,12 Sl 104,9 Pro 8,29 Sl 74,16 24,17 Sl 9,14; 107,18; Sap 16,13; Is 38,10 10,21 38,4 14,1 Mt 19,26; Lk 1,37 38,2 11,5-6 Is 6,5
--	---

^a Autór halo komparasaun entre mundu no manta ida ne'ebé lidik atu halo monu nati ka animal sira seluk

^b La hakerek, maibé autór hanoin ba hatais festa nian

^c Iha kalan, ema aat sira bele halo sira-nia krime, maibé bainhira iha naroman, ema hotu bele haree buat ne'ebé ema halo.

^d Maski eskriba Israel nian no Job nia belun sira nega katak bele halo Maromak nia esperiênsia, autór subliña katak ema iha possibilidade atu halo esperiênsia direta ho Maromak.

